

**6 September**

**Skrifgedeelte: Spreuke 17, 18**

**Fokusgedeelte: Spreuke 1:25,30**

### **Laat God jou tereg wys**

Tereg wys is om te vermaan (1 Kor 4:14), te berispe (Hos 4:4), te waarsku (1 Kor 10:11). In Spreuke 1:22-33 vermaan God onkundiges, grootpratens en swape (vers 22). Hy kla hulle aan dat hulle hul nie wou laat tereg wys nie (vers 23) en sy tereg wysings minag (vers 30). God vermaan hulle oor hulle sondes. Hy berispe en waarsku hulle oor die kwaad wat hul doen, maar hulle verwerp God se waarskuwings (Spr 10:17) en ignoreer sy tereg wysings (Sag 1:4). Jy is dom en dwaas as jy die tereg wysing van God minag. God wys sondaars tereg uit goddelike liefde (Heb 12:5-6) om hulle tot bekering te lei (Tit 1:13). Die sondaars van Spreuke 1 wou hulle nie laat tereg wys nie, want hulle was in hulle eie oë nie verkeerd nie. Hulle word só in beslag geneem deur hulle eie begeertes, behoeftes en strewes, dat hulle die stem van God nie hoor nie en ook nie aan Hom dink nie. Dat hulle die Wet van die Here oortree, kom nooit by hulle op nie. Dit gaan net om hulleself. Daarom dat dit hulle glad nie pla dat hulle hulle nie steur aan die Here se tereg wysings nie, want die Here self is nie meer vir hulle belangrik in hulle lewe nie. Hoe reageer jy op God se tereg wysings? Sy tereg wysings oor jou moontlike swak erediensbywoning (Heb 10:25); slegte begeertes (1 Pet 1:14); aanhoudende dronkenskap (Ef 5:18); sigbare luiheid (Spr 6:6-9); onredelike jaloesie (1 Pet 2:1); vreeslike naywer (Jak 3:14); moedswillige rusies (Jak 4:1); beplande egskeiding (Mal 2:16) !! Wat is jou antwoord? Sê dit self vir die Here!

Sing: Psalm 19:6

Ds CN van der Merwe (Klerksdorp)